

Dr. sc. Omer Hamzić

LISTOVI GRAČANIČKOG KALENDARA OD 29. 4. DO 29. 10. 2009.

29. 4. 2009.

7. sjednica Općinskog vijeća: usvojen novi Statut općine Gračanica, dana saglasnost za kupovinu većinskog dijela Sportske sale "Luke", razmatrani izvještaji o radu javnih ustanova iz oblasti zdravstva i Dječjeg obdaništa

Tokom rasprave o ovom dokumentu Komisija općinskog vijeća za propise i Statut bila u konstantnom zasjedanju. Njen zadatak je bio da u svojstvu predlagača novog Statuta općine, na osnovu vijećničkih diskusija o prispjelim amandmanima na Statut, formuliše rješenja koja će biti prihvatljiva za najmanje dvije trećine vijećnika koliko je potrebno da bi novi Statut bio usvojen. Nakon duže rasprave o nadležnostima Vijeća i načelnika "po pitanju imenovanja članova u nadzorne i upravne odbore javnih ustanova, javnih preduzeća i javnih zdravstvenih ustanova, novi tekst Statuta općine Gračanica je jednoglasno usvojen.

Nakon dužih priprema Općinsko vijeće je konačno dalo saglasnost općinskom načelniku da izvrši neophodne aktivnosti u

cilju kupovine objekta sportske dvorane od d.o.o. "Sportska sala" Gračanica.

U nastavku sjednice općinski vijećnici su JZU Opća bolnica dali saglasnost na plan prioriternih kapitalnih ulaganja u 2009. godini, a nakon dužih rasprava i zahtjeva da se uz izvještaje o radu i finansijskom poslovanju u 2008. god. dostave i izvještaji o radu Upravnih odbora, vijeće je usvojilo izvještaje o radu u 2008. g. JZU Opća bolnica, Dom zdravlja i Gradska apoteka.

Razmatran je i usvojen Izvještaj o radu JU Dječje obdanište sa podacima o neizmirenim poreskim obavezama te isti i usvojilo.

6. 5. 2009.

Položen kamen temeljac za dogradnju Doma zdravlja u Gračanici

Problem prostora već duže vrijeme je evidentan u gračaničkom Domu zdravlja. Ovaj problem još izraženiji zbog toga što u postojećoj zgradi nema liftova, a pojedina odjeljenja, kao recimo radiološko, nisu smještena u suterenu ili prizemlju, nego na spratu, što je stvaralo dodatne probleme pacijentima. U želji da kvalitetno i dugo-

ročno riješe taj problem, u Domu zdravlja su odlučili da pristupe dogradnji objekta dimenzija 30 x 15 metara na tri etaže, u kojem bi u prizemlju bile smještene radiologija i laboratorija, a na ostalim etažama ambulante porodične medicine i Uprava. Predračunska vrijednost objekta je oko 1.300.000 KM.

Na skromnoj svečanosti povodom polaganja kamena temeljca, kojem su, pored uposlenih u Domu zdravlja i Općoj bolnici "Dr. Mustafa Beganović", prisustvovali i brojni gosti, općinski načelnik Nusret Helić je izrazio dvostruko zadovoljstvo: "Prvo što počinjemo izgradnju objekta koji će poboljšati nivo zdravstvene zaštite naših građana i stvoriti uposlenicima bolje uslove za rad i drugo, što sve to radimo u dane kada se obilježavaju Dan pobjede nad fašizmom i Dan Europe. Ovo danas pokazuje da pouzdati ljudi Gračanice, koji imaju viziju mogu, graditi ovakve objekte i u vrijeme recesije."

Kamen temeljac položili su zajedno općinski načelnik Nusret Helić i resorni kantonalni ministar dr. Asim Musić.

20. 5. 2009.

Otvoren međuopćinski centar za rijeku Spreču

U prisustvu predstavnika italijanske provincije Arezzo, italijanske ambasade u BiH, Međunarodnog foruma solidarnosti i predstavnika pet općina: Gračanica, Petrovo, Lukavac, Doboj-Istok i Doboj, u Gračanici je otvoren Međunarodni centar za rijeku Spreču. Projekat ima dva cilja: prvi, da se stvori zajednička struktura civilne zaštite za svih pet općina koje participiraju u projektu, a drugi – da se kroz zajedničko djelovanje tih općina pomogne u prevazilaženju problema proisteklih iz rata. Imajući u vidu povezanost deminiranja s jedne strane i zaštite i regulacije vodotoka, kao ekološkog projekta s druge strane, gosti iz Italije su istakli da bi se određeni dio sredstava za deminiranje mogao dobiti i iz fondova koji se bave zaštitom vodotoka, odnosno život-

ne sredine u cijelosti.

Na svečanom otvaranju prisutnima se obratio Vinčenco Čekareli, predsjednik provincije Arezzo, a o značaju projekta govorili su općinski načelnik Nusret Helić i Mladen Mičić, zamjenik načelnika općine Doboj.

21. 5. 2009.

Iskorak gračaničke firme "Kovan" u Evropu: potpisan ugovor sa Slovincima za isporuku 150 kotlova na biomasu

Vlasnik gračaničke firme doo «Kovan», specijalizovane za proizvodnju kotlova na biomasu, Said Karalić, potpisao je ugovor o poslovnoj saradnji sa predstavnikom firme «Bioles Horizont» iz Slovenije Dejanom Cverlinom o isporuci 150 kotlova na biomasu koji će se izraditi tokom ove godine u pogonima «Kovana» u Gračanici. Riječ je o aranžmanu vrijednom oko 800 hiljada konvertibilnih maraka, koji će omogućiti zapošljavanje novih radnika (sada firma ima 50 uposlenih), te udvostručiti vrijednost izvoza, koji je u 2008. godini iznosio 1,5 miliona KM.

"Na ovaj način «Kovan» širi svoju mrežu u Evropi, jer ćemo preko naših partnera u Sloveniji eko kotlove izvoziti u Njemačku, Austriju, Češku, pa i u Portugal", rekao je nakon potpisivanja ugovora Said Karalić.

25. 5. 2009.

Dan odbrane općine Gračanica: položen kamen temeljac za Centralno šehidsko spomen-obilježje u Gračanici

Glavni događaju u programu ovogodišnjeg obilježavanja 25. maja, Dana odbrane općine Gračanica bilo je polaganje kamena temeljca za Centralno šehidsko spomen-obilježje poginulim borcima i šehidima tokom rata za Bosnu i Hercegovinu (1992.–1995.), koje je nakon dugotrajne rasprave i različitih prijedloga, po odluci Općinskog vijeća, locirano u velikom parku ispred Konaka (općine), u neposrednoj blizini Mješovite srednje škole i gračaničke Gimnazije.

Kamen temeljac zajedno su položili općinski načelnik Nusret Helić, ministar za

boracka pitanja u Vladi TK Bahrija Mehurić i Zikreta Karić, predsjednica Organizacije porodica šehida i poginulih boraca.

Dinamikom izgradnje predviđeno da se ovo spomen obilježje završi i otkrije za Dan odbrane 2010. godine. eno do kraja ove godine.

27. 5. 2009.

Osma sjednica Općinskog vijeća: u znaku izvještaja i izvještavanja o radu javnih preduzeća “Komus”, “Vodovod i kanalizacija” i Veterinarska stanica, te Općinskog suda u Gračanici

Osim toga prihvaćena je Odluka kojom se predviđa izrada Plana kapitalnih investicija na općini za period od 5 godina i dvije informacije: o sakupljanju, odvozu i deponovanju komunalnog otpada i informacija o stanju kategorisanih i nekategorisanih puteva na području općine Gračanica. Što se tiče otpada, konstatovano je da su mnogi problemi koji prate ovu oblast posljedica odustajanja od projekta izgradnje regionalne deponije na području Lukavca i zaključeno da se hitno traže dugoročna rješenja (izrada studije) koja će zadovoljiti potrebe općine. U vezi sa putnom infrastrukturom na općini, zaključeno je da se uradi poseban program održavanja postojećih puteva na području općine, da se što prije pristupiti rješavanju imovinsko pravnih odnosa za sve puteve, te da se od mjesnih zajednica obezbijede spiskovi svih puteva kako bi se moglo cjelovito pristupiti izmjenama i dopunama postojeće Odluke o kategorizaciji puteva na području općine Gračanica.

2. 6. 2009.

Dan općine Gračanica: svečana sjednica Općinskog vijeća, priznanja zaslužnim, donacija bratskog grada Florija

Pored ostalih visokih gostiju, svečanoj akademiji su prisustvovali Mari Kler Bone, konzul Francuske u BiH, Pjer Buše i gradonačelnik bratskog grada Fleury les Obrais-a sa saradnicima, koji je, pozdravljajući prisutne, u ime svog grada, općini Gračanica uručio novčanu donaciju u iznosu od

35.000 eura za izgradnju mosta preko rijeke Sokoluše, kod Šumarije.

Nakon pozdravnih riječi i podsjećanja da se 2. juni, koji Gračanlije simbolično obilježavaju kao Dan općine, vezuje za jedan od temeljnih datuma iz gradskog i općinskog povijesno-kulturnog rodoslovlja i pravni akt potpisan prije 580 godina u kraljevskom gradu Sokolu nadomak Gračanice, kao dokaz jedne kulturno-civilizacijske vertikale ovog kraja i njegovog pravno-političkog ustrojstva još iz doba srednjovjekovne države, općinski načelnik Nusret Helić je istakao sve uspjehe koji su obilježili proteklu godinu, apostrofirajući projekte temeljne rekonstrukcije i asfaltiranja lokalne putne mreže, nastavka regulacije korita Sokoluše, toplifikacije Gračanice, te projekte vezane za obrazovanje, kulturu, sport i zaštitu zdravlja ljudi i dodao: “Što se tiče lokalne uprave, imamo, prema ocjenama onih koji nas prate, jednu od najefikasnijih i najracionalnije organizovanih općinskih administracija u Federaciji. Zašto ne spomenuti da za održavanje te administracije trošimo manje sredstava nego što ulažemo u kapitalne projekte.”

Prije izvođenja prigodnog kulturno-umjetničkog programa, uručena su općinska priznanja i nagrade sljedećim dobitnicima: Udruženju poslodavaca Gračanica, Mjesnoj zajednici Lukavica i Radio klubu Stjepan Polje (*Zlatna plaketa*), Bričić Azizu, Čamdžić Ademu i Rešidbegović Sevlji svi iz Gračanica, zatim Avdić Himzi iz Stjepan Polja, Halilović Sulji iz Babići i Hasić Mustafa iz Malešića (*Zlatna značka*).

2. 6. 2009.

Dan općine Gračanica: pušten u promet novoizgrađeni most “Rampa” u Gračanici

Po završetku Svečane akademije, predat je na upotrebu novoizgrađeni most “Rampa”, a simboličnim presijecanjem vrpce to su učinili općinski načelnik Nusret Helić i gradonačelnik bratskog grada Fleury les Obrais-a Pjer Buše. Izgradnja ovog mosta

koštala je oko 340.000 KM, a sredstva su obezbijedena iz Budžeta općine Gračanica.

1. 6. 2009.

Delegacija bratskog grada Fleury Les Obrais-a posjetila Srebrenicu

Boraveći u Gračanici povodom Dana općine, delegacija Fleury Les Obrais-a, na čelu sa gradonačelnikom Pjerom Bušeom, zajedno sa predstavnicima NVO "Veze sa svijetom" iz Fleury-a, u pratnji domaćina iz Gračanice, posjetila je Srebrenicu. Nakon obilaska Memorijalnog kompleksa u Potočarima, održan je čas historije na kojem su gostima prezentirane glavne činjenice o razmjerama tragedije i zločina koji se desio na tom prostoru, potom je obavljena posjeta Muzeju genocida, gdje su delegacije pogledale film o genocidu u Srebrenici. Delegaciju iz Francuske i Gračanice primio je i pozdravio načelnik općine Srebrenica Osman Suljić i u kraćem razgovoru prezentirao osnovne podatke o toj općini.

3. 6. 2009.

Delegacija bratskog grada Fleury Les Obrais-a obišla izletišta Monj i posjetila spomen-kompleks u Doborovcima

Na ovom spomen-kompleksu nalaze se spomenici poginulim partizanima u Drugom svjetskom ratu u čuvenoj bici na Monju (1944.) i borcima Armije BiH u ratu 1992.-1995. godine, što je jedinstven slučaj na općini Gračanica ali i šire. Za goste je održan čas historije i upriličena šetnja na platou izletišta Monj.

11. 6. 2009.

Ekološko grijanje za ekološku Gračanicu

... je naziv prezentacije na kojoj su predstavnici DOO "Eko toplane" informisali građane Gračanice dokle su stigli i u kojoj se fazi nalazi realizacija tog velikog ekološkog projekta. Velikom broju okupljenih građana i predstavnika privrednih subjekata, budućih kupaca toplotne energije, o projektu su govorili ing. Enes Hamidović, predstavnik austrijske firme "Seges", kao većinskog vlasnika DOO "Eko toplane" i ing. Hasan Mostarlić, direktor te fir-

me u Gračanici.

Između ostalog, obećali su će, bez obzira na teškoće s kojima se svakodnevno suočavaju na trasi (imovinski odnosi, nedostatak katastra podzemnih instalacija, pa i nerazumijevanja pojedinaca, do početka grejne sezone sa magistralnim toplovodom doći u centar grada.

Predstavnici općine na ovom sastanku, Muharem Musić, predsjedavajući Općinskog vijeća i Aida Hodžić, u ime Općinskog načelnika i resornih službi, još jednom su podvukli da je ova investicija od strateškog značaja za općinu, jer joj je krajnji cilj da ovaj grad postane ekološki zdrava sredina, poželjna za život čovjeka.

Pošto su dalji odgovore na brojna pitanja prisutnih, predstavnici investitora pozvali su još jednom građane i privredne subjekte da se prvo informišu o svim prednostima ovog projekta, a zatim da se prijave za priključenje kako bi se toplovodna mreža što racionalnije projektovala i konačno instalirala.

12. 6. 2008.

Završena prva faza izgradnje Centralnog spomen-obilježja poginulim borcima i šehidima i započeta gradnja nove administrativno-upravne zgrade općine u Gračanici (Centar za pružanje usluga građanima)

Izgradnja spomen-obilježja šehidima i poginulim borcima započela je polaganjem kamena temeljca za Dan odbrane općine, 25. 5. 2009. godine. Do 30. 06. 2009. godine završeni su radovi prve faze, a to su zemljani, betonski i radovi na elektroinstalacijama. Druga faza radova obuhvatit će kamenorezačke radove i radove na popločavanju prilaznih staza i kružnog platoa spomen-obilježja. U toku je procedura provođenja postupka javne nabavke za izbor najpovoljnijeg izvođača za ove radove. Završetak radova i svečano otkrivanje ovog spomenika predviđeno je za 25. 5. 2010.

Radovi na izgradnji nove administrativno-upravne zgrade Općine Gračanica



Centralno šehidsko spomen-obilježje, prva faza gradnje

započeli su 12. 06. 2009. god rušenjem starih objekta na lokaciji iza “Konaka” (zgrade općine). Izvođač radova je “Sagra” d.o.o. iz Gračanice. Ugovoreno je da se do 15. novembra 2009. godine završe građevinski radovi na cijelom objektu, a zanatski samo u prizemlju, gdje će se nalaziti novi Centar za pružanje usluga građanima i koji bi u saradnji sa GAP-om trebao biti pušten u rad do početka 2010. godine.

14. 6. 2009.

Otvorena džamija u Stjepan Polju – džemat Polje: džamiju otvorila djeca šehida – Rešida Ibrahimović i Muhamed Kruškić

Ovoj svečanosti prisustvovali su predstavnici Islamske zajednice Bosne i Hercegovine, društvenog i političkog života općine Gračanica, te veliki broj vjernika, kako iz Stjepan Polja, tako i iz susjednih sela i iz dijaspore.

Izgradnja džamije finansirana je isključivo iz donacija privrednih subjekata, a ne od građana. Riječ je o izuzetno lijepom objektu, pored magistralnog puta Doboj Tuzla. Između ostalih gostiju, okuplje-

nim džematlijama i mnogobrojnim gostima obratio se i Općinski načelnik Nusret Helić i, između ostalog, rekao: “U svakodnevnom životu nas muslimana Bošnjaka, moramo poštovati razlike, pa, što ne reći, i političke, ali i dobro znati naše glavne pravce i ciljeve, na svim nivoima, oko kojih ne može i ne smije biti neslaganja. To “temeljno zajedničko” mora biti polazište za sve naše ozbiljnije buduće projekte. Inače, oni će i dalje ostajati mrtvo slovo na papiru. Ovakvi poduhvati pokazuju koliko mnogo dobrog za sebe i ovu zemlju možemo uraditi, zajednički i složno. Čeka nas mnogo krupnih poslova na svim nivoima oko kojih ne može i ne smije biti nikakvih dilema – podrazumijeva se i puno više rada i samoodricanja. Usudujem se reći, ako nisu suviše prekrupne riječi, da je to prvi uslov naše drugačije i bolje budućnosti, budućnosti onakve kakvu mi svi želimo.

Neka nam i ova džamija i ovo naše današnje okupljanje bude ne samo jedno lijepe iskustvo već i nadahnuće i podstrek za sve naše buduće zajedničke akcije i narodne poslove, kako u našim domaćinstvima,



u našim kućama i avlijama, tako i u široj zajednici, džematu, mahali, mjesnoj zajednici, humanitarnoj organizaciji, u našem svakodnevnom poslu. Ponavljam opet, u jedinstvu i slozi.”

27. 6. 2009.

**Umro Ramiz Grapkić, ratni komandant
Petog bataljona, 111. gračaničke brigade
A BiH, općinski vijećnik**

Malo je reći da je ovaj čovjek puno uradio za svoju mjesnu zajednicu, za našu općinu, za patriotski pokret kojem je pripadao, za državu Bosnu i Hercegovinu... Malo i frazerski. Ramiz je bio drugačiji, bolji, vredniji. Svi tako govore koji ga bolje poznaju. Njegova životna staza bila je do kraja ispunjena onim što čini smisao života svakog čovjeka: poštenim i produktivnim radom, ljudskom dobrotom i odgovornošću, nadasve, za sve ono što čovjek čini ili ne čini. Nije lahko oprastati se sa ljudima ovako časne biografije, nije lahko zamisliti prazninu koja ostaje zauvijek iza ovakvih ljudi, izgovoriti ili o njima zapisati pravu riječ. I uvijek će nam se javljati pitanje – kako se ubuduće sjećati ovakvih ljudi – koji su

nas toliko zadužili, kako se boriti protiv zaborava, kako ih ne dati zaboravu. Pred neumitnom smrću, nažalost, nemamo odgovora na ta pitanja. Na mjesnom greblju u Stjepan Polju, ovog junskog dana, odata je posljednja počast čovjeku – borcu, domaćinu, komšiji, dragom prijatelju – koji je bio istinski borac, ali nije izašao kao pobjednik u posljednjoj bici svog života. Nije mogao pobijediti opaku bolest. Kako u nekoliko riječi reći ono najvažnije što je za života krasilo našeg Ramiza?

Rođen je 1961. godine u Stjepan Polju, poslije osnovne škole u rodnom selu, završio podoficirsku školu u Sarajevu... Patriotski osjećaj odveo ga je u prve redove odbrane Bosne i Hercegovine, u proljeće 1992. godine, onda kad je, kako se to kaže, bilo “stani pani”. Kao pripadnik Patriotske lige, 3. 5. 1992. godine, dospio je u ruke neprijatelja Bosne i Hercegovine i prošao džehe-nnem Manjače – bolje reći prolazio ni živ ni mrtav punu godinu dana.

Čim je, na svoju sreću, razmijenjen, uključio se u redove Armije Bosne i Hercegovine, gdje su mu kao hrabrom i odgovornom čovjeku i dokazanom patrioti, povjereni važni poslovi i odgovorne dužnosti, prvo komandira čete, a zatim komandanta 5. bataljona 111. gračaničke brigade. Kao školovan oficir, po završetku rata, jedno vrijeme ostao je u Armiji Bosne i Hercegovine, da bi se kasnije uključio u brojne društvene aktivnosti u svom rodnom Stjepan Polju, jedno vrijeme kao uspješan predsjednik Mjesne zajednice, u ovom mandatu i vijećnik Općinskog vijeća Gračanica. Odlikovao se svojim principijelnim stavovima, jasnim porukama i iskrenim zalaganjem za ono u što je bio ubijeđen da je dobro za svaki naš džemat, za svaku našu mjesnu zajednicu, za općinu u cjelini. Bio je ubijeđen da se samo tako može dobiti konačna bitka za Bosnu i Hercegovinu. I sagorio u toj bici.

Neka ti je rahmet veliki i lahka zemlja bosanska, komandante. Ponosni smo što smo te takvog imali.

27. 6. 2009.

Svečano otvorena džamija u Babićima

Ovoj svečanosti prisustvovao je veliki broj vjernika iz cijele Bosne i Hercegovine i dijaspore. Gostima je dobrodošlicu zaželio mjesni imam Alija ef. Zaketović, a potom su govorili glavni predsjednik Građevinskog odbora Tajib Sulejmanović, imam Medžlisa Islamske zajednice Gračanica, Smaji ef. Mustafić, općinski načelnik Nusret Helić, Muftija tuzlanski Husein ef. Kavazović i izaslanik Rijasetu IZ BiH Zija def. Ljevaković. U svom obraćanju općinski načelnik Nusret Helić je između ostalog, rekao:

“Ja jednostavno hoću da izrazim svoju radost što danas obilježavamo završetak jednog posla. dakle gradimo i otvaramo džamije, ali vi vidite da na našoj općini mi gradimo i druge objekte privredne, društvene, puteve, vodovode itd. Pitam se kada to mi nismo imali teškoća? U nekim vremenima teškoće su znale biti izazov i inspiracija, naravno kad mi to hoćemo i kada smo složni po ključnim pitanjima našeg opstanka na ovim prostorima. Gradnja ovakvih objekata potvrđuje nam koliko



možemo uraditi za sebe kad smo skoncentrisani na glavne stvari i kada to hoćemo. Hoću da kažem da bih volio bih da kao muslimani Bošnjaci, kao ljudi koji vjeruju u Boga i Božje poslanje budemo jedinstveni i u svim drugim poslovima koji su od zajedničkog interesa i općeg značaja za našu zajednicu, volio bi da nam Bog podari snage i da nas osposobi da svi skupa možemo što lakše raspoznati te zajedničke interese – za opće dobro, međusobno razumijevanje i solidarnost. Usudujem se reći, ako nisu suviše prekrupne riječi, da je to prvi uslov naše drugačije i bolje budućnosti, budućnosti onakve kakvu mi svi želimo.”

30. 6. 2009.

Tematska sjednica Općinskog vijeća Gračanica: usvojene mjere štednje

Za održavanje ove sjednice inicijativu je dalo nekoliko političkih stranaka koje participiraju u Vijeću. Nakon dvosatne rasprave usvojene su mjere koje je predložio Općinski načelnik, polazeći od načela ustavnosti i zakonitosti, načela efikasnosti (u radu administracije) i načelo ekonomičnosti. Obećao je da će povećati efikasnost rada i u pogledu smanjenja broja neriješenih predmeta i skraćivanja roka rješavanja, ali i efikasnije naplate i ostvarivanja vlastitih prihoda (rente, zakup, uzurpacije, itd.), stalno pratiti realizaciju ugovora u vezi sa prihodima radi blagovremene naplate i naplate prinudnim putem, zbog činjenice da ekonomska kriza najviše pogađa najugroženije kategorije stanovništva, mjerama štednje i na druge načine osigurati da se povećaju ili bar ne smanje budžetska izdvajanja za socijalne slučajeve i boračku populaciju. Osim mjera štednje i racionalizacije unutar službi, izvršit će se smanjenje reprezentacije za novih 10 % (već smanjeno za 10 %), troškova telefona za novih 10 %, a mobilnih za 20 %, ukinuti sve naknade za rad u komisijama, uključujući i naknade za rad u komisijama Vijeća, općinskim vijećnicima i općinskim službenicima, smanjiti dnevnice za službena putovanja za još

10 %, (već smanjeno za 10 %), odustati od isplate jubilarnih nagrada itd

Dok se ne stvore uslovi za rebalans budžeta (usvoji Zakon i njegovo tumačenje dostave revidirane procjene prihoda), izvršenje budžeta i plaćanja vršiti u skladu sa prilivom sredstava i prioritetima. Sva izdvajanja koja neće ugroziti funkcionisanje osnovnih funkcija svesti na racionalnu mjeru (proslave, susrete, sponzorstva, udruženja i slično), provesti postupke i procedure penzionisanja radnika koji su stekli ili stižu uslove za penzionisanje (starosnu, invalidsku, prijevremenu), zadržati postignuti nivo u osnovnim komunalnim djelatnostima (snabdijevanje pitkom vodom, čišćenje grada, odvoz smeća).

U cilju realizacije krupnih projekata na općini (toplifikacija, vodosnabdijevanje, odlaganje otpada i slično), za koja nedostaju sredstva, izvršiti kvalitetnu pripremu u cilju korištenja pretpristupnih i drugih fondova i sredstava drugih izvora. Na vrijeme i sa već pripremljenim projektima, aplicirati na sve javne pozive za grant sredstva.

Zahtjevi privrednih subjekata i dalje će biti prioritet u radu općinskih službi, a plaćanje naknada (rente, uređenje građevinskog zemljišta, komunalne takse i slično) omogućiti na više mjesečnih rata, preispitati postojeće takse i naknade iz nadležnosti Općine, ostvariti punu saradnju sa Udruženjem poslodavaca i samostalnih privrednika.

Općinski načelnik je zadužen da pripremi odluku o formiranju razvojnog tima općine Gračanica.

30. 6. 2009.

Deveta sjednica Općinskog vijeća: u znaku informacije o konstituisanju vijeća mjesnih zajednica na području općine

Nakon rasprave na tematskoj sjednici o teškoj finansijsko-materijalnoj situaciji na općini, koja je posljedica ekonomske krize u svijetu i kod nas, interesantno je da su sat kasnije, na redovnoj sjednici vijećnici čutke (bez ikakve rasprave) prihvatili Informaci-

ju o aktuelnim privrednim kretanjima na općini u 2008.godini.

Ali zato je Informacija o konstituisanju vijeća mjesnih zajednica izazvala najviše interesovanja i diskusija u dijelu koji se odnosi na konstituisanje Vijeća mjesne zajednice Lukavica, zbog različitog tumačenja postupka oko zamjene izabranog člana vijeća mjesne zajednice od strane Bosanske patriotske stranke.

Prilikom razmatranja Informacije o kvalitetu vode na području općine Gračanica vijećnici su istakli zahtjev da se Služba za poduzetništvo, lokalni razvoj i finansije aktivno uključi u aktivnosti kojima bi mjesne zajednice vodoopskrbne objekte organizirale u skladu sa Zakonom o vodama.

11. 8. 2009.

Realizacija projekata GAP-a u općini Gračanica: općinska uprava – servis građana: na pomolu umrežavanje mjesnih ureda i elektronsko opremanje šalter-sale

Nakon potpisivanja Memoranduma o razumijevanju između GAP-a (projekti upravne odgovornosti) i Općine Gračanica formirana je radna grupa odgovorna za implementaciju projekta MAP. Šta je suština tog projekta? Riječ je o takozvanom Općinskom akcionom planu, koji predviđa da se u narednom trogodišnjem periodu realizuju prioritete u procesu poboljšanja načina pružanja usluga građanima općine Gračanica i općinskog upravljanja. Zadatak spomenute radne grupe bio je da zajedno sa predstavnicima GAP-a identifikuje prioritete u unapređenju pružanja usluga građanima u skladu sa Strategijom razvoja općine, Politikom i Priručnikom kvalitete (standard BAS EN ISO 9001:2000), te da radi na implementaciji projekata definisanih u akcionom planu. Cijeli proces podrazumijeva i uključivanje šireg javnog mnjenja sa područja naše općine.

U tom smislu, u proteklom periodu održano je više sastanka na nivou MAP radne grupe na kojima je definisano neko-

liko konkretnih projekata kao prioriteta za podršku od strane GAP-a. Mišljenje javnosti o ovim projektima ispitano je putem ankete metodom "razgovor licem u lice" sa slučajno odabranim osobama. Anketirano je 100 građana, različite starosne i socijalne strukture, od toga 59 muškaraca i 41 žena.

Na osnovu rezultata te ankete projekti utvrđena je sljedeća prioriteta lista projekata: Umrežavanje mjesnih ureda radi obezbijedenja brže i kvalitetnije usluge građanima u mjesnim zajednicama, Unaprijeđenje upravljanja informacionim tehnologijama u našoj Općini, kontrolom radnog vremena, kontrolom i upravljenjem redova čekanja na šalterima (maksimalno smanjenje čekanja), osiguranjem općinske zgrade te adekvatnom edukacijom IT administratora, Kreiranje potpune elektronske baze podataka i unapređenje upravljanja toka dokumenata, Zakonom predviđena upotreba licenciranih softvera.

Predloženi projekti će biti realizovani u skladu sa usvojenom rang listom iz sredstava granta GAP-a i sredstava budžeta Općine Gračanica. GAP može finansirati najviše 5 projekata ukupne, procijenjene vrijednosti od 60.000 \$ (dolara), a učešće Općine Gračanica bit će do 10 % od odobrenog iznosa od strane GAP-a.

Odgovarajuće odluke u vezi sa daljom implementacijom ovih projekata bit će donesene na jednoj od narednih sjednica Općinskog vijeća.

8. – 17. 8. 2009.

Obilježena 65. godišnjica bitke na Monju: obnovljeno spomen obilježje na platou Monja

Obilježavanje ove čuvene bitke iz Drugog svjetskog rata, koja se tradicionalno zove "Doborovačka proslava", kao manifestacija antifašizma i sjećanja na poginule šehide i borce kako u Drugom svjetskom ratu, tako i u posljednjem ratu za Bosnu i Hercegovinu, počelo je 2. 8. 2009. godine prigodnim vjerskim programom, obilascima mezarja i polaganjem cvijeća na



Spomenik poginulim borcima iz oba rata u Doborovcima

spomen-obilježja u znak zahvalnosti i poštovanja za sve one koji su dali život u anti-fašističkoj borbi u Drugom svjetskom ratu i borbi za Bosnu i Hercegovinu.

Obilježavanje je nastavljeno u subotu, 8. 8. 2009. godine, kod spomen obilježja poginulim borcima iz oba rata, simboličnom smotrom preživjelih boraca slavne Doborovačke čete, koju je postrojio Abdulah Subašić, jedan od njenih ratnih komandira i kulturno-umjetničkim programom u kojem je učestvovalo Kulturno-umjetničko društvo iz Vučkovaca i vokalni sastav ilahija Medžlisa Islamske zajednice iz Gračanice.

Na inicijativu Općinskog odbora antifašista i Saveza udruženja boraca NOR-a, na platou Monja, obnovljeno je i, 17. 8. 2009. godine, otkriveno spomen obilježje, koje se sastoji od 17 ploča ugrađenih u kamene stijene Monja sa imenima poginulih partizana u Bici na Monju, 10. 8. 1944. godine.

17. 8. 2008.**... i početak gradnje džamije za naselja Luke i Hajdarevac**

Polaganjem kamena temeljca, nakon dužih priprema i velikog zalaganja inicijativnog i građevinskog odbora, na čijem je čelu Čamil, označen je početak gradnje te džamije. Ovom činu prisustvovao je veliki broj gostiju i građana Gračanice. Džamija se gradi neposredno pored puta, koji vodi u Hajdarovac, u neposrednoj blizini raskrsnice kod "Fortune i "Feringa", na parceli Hadžaševo greblje.

27. 8. 2008.**Deseta sjednica Općinskog vijeća: razmatrano 12 tačaka dnevnog reda**

...od kojih izdvajamo izvještaj o izvršenju budžeta općine Gračanica za prvo polugodište 2009.godine kao i izvještaj o utrošku budžetske rezerve za prvih 6 mjeseci 2009.godine, koji su izazvali najveću pažnju vijećnika. U ovom periodu prihodi su ostvareni u iznosu od 4.680.202 KM, što je 15,44% manje od planiranih i 5,55% manje u odnosu na isti period prošle godine. Na budžetskoj stavci "primici", ostvaren je iznos od 398.068 KM ili 50,39% u odnosu na plan. U strukturi prihoda, podbačaj je na poreznim prihodima 21,93% u odnosu na plan i 19,34% u odnosu na isti period prošle godine. Neporezni prihodi ostvareni su u iznosu od 933.111 KM, što je manje za 4,79% u odnosu na isti period prošle godine. Iz toga proizlazi da je obim budžeta za prvih šest mjeseci ostvaren u ukupnom iznosu od 5.078.270 KM što je za 12,02% manje u donosu na ostvarenje u istom periodu prošle godine i 19,7% u odnosu na plan, što je, očigledno, posljedica recesije. Otuda se mogu očekivati dalje mjere štednje i kresanja budžetske potrošnje na ovoj općini.

Pored izvještaja o Budžetu, Vijeće je usvojilo 5 odluka: o usvajanju općinskog akcionog plana (MAP) za period 2009. – 2001., o pristupanju i učešću u mreži radnih tijela zaduženih za praćenje primjene



Detalj sa sjednice Općinskog vijeća

etičkog kodeksa, o utvrđivanju uslova, kriterija i postupka dodjele stipendija učenicima srednjih škola i studentima, o broju i visini stipendija za učenike srednjih škola i studente u školskoj 2009/10. godini, po kojoj će se dodijeliti 73 stipendije u godišnjem iznosu od 1.200 KM za studente i 600 KM za učenike.

Pažnju vijećnika privukle su i dvije informacije: o stepenu zagađenosti zraka i vodotoka na području općine i zaštiti imovine od požara na području općine u 2008. godini. U prvoj je konstatovano da stepen zagađenosti zraka u Gračanici prelazi dozvoljene granice u zimskom periodu, što će se svakako popraviti realizacijom projekta toplifikacije, a u drugoj je konstatovano da su gračanički vatrogasci u prošloj godini mali 80 intervencija i da je svaki vatrogasac u prosjeku imao 60,7 sati vanrednog angažovanja tokom godine. Zabrinjava i dalje slaba tehnička opremljenost Teritorijalne vatrogasne jedinice, što će se morati rješavati u narednom periodu, želimo li efikasniju organizaciju protivpožarne na općini.

Na ovoj sjednici počelo se sa davanjem saglasnosti na statute mjesnih zajednica. Ovoga puta vijećnici su dali saglasnost na Statut MZ Džakule.

24. 9. 2009.**11. sjednica općinskog vijeća: podrška općini Tuzla u procesuiranju Milorada**

Dodika, formiran općinski razvojni tim, data u javnu raspravu odluka “za čist zrak u Gračanici”

Prije prelaska na dnevni red, prihvatilo je inicijativu Kluba vijećnika SDP, kojom se daje puna podrška općini Tuzla u postupku krivičnog procesuiranja Milorada Dodika za negiranje zločina na Markalama i Tuzlanskoj kapiji, 25. maja 1995. godine.

Potom je, prelazeći na dnevni red Vijeće pokrenulo postupak ažuriranja i nadogradnje Strategije ekonomskog razvoja općine, putem integriranja postojećih strateških dokumenata u jednu sveobuhvatnu Strategiju ekonomskog razvoja općine Gračanica i uspostavilo Općinski razvojni tim kao operativno i koordinaciono tijelo od 17 članova, zaduženo za taj posao, koje je sastavljeno od predstavnika općinskih organa uprave, predstavnika privrede, javnih preduzeća i ustanova, nevladinog sektora itd.

Vijeće je usvojilo još nekoliko odluka, informacija i izvještaja, u konačnom prijedlogu ili nacrtu, među kojima je najviše pažnje izazvao Nacrt odluke o snabdijevanju toplotnom energijom stambenog i poslovnog prostora daljinskim grijanjem u Gračanici i uslovima za isporuku u preuzimanje toplotne energije. Riječ je o prvom pravnom aktu te vrste koji u skladu sa važećim ekološkim zakonima reguliše pitanje zagađenja zraka na ovoj općini i propisuje obaveze postojećih i budućih potencijalnih zagađivača u pogledu zaštite okoline i zdravlja građana. To se, prije svega, odnosi na izgradnju i rekonstrukciju lokalnih izvora toplote za zagrijavanje stambenog, poslovnog i drugog prostora, koji će biti dužni da pribave dokaz “od ovlaštenog organa o ekološkom uticaju izvora toplote na okolicu” (okolinska dozvola). Krajnji cilj je da se smanji broj ložišta, koji nekontrolisano i preko dozvoljenih granica, zagađuju zrak i konačno-ekološki čista Gračanica. Za sprovođenje ovakvih mjera stekli su se ili se stižu uslovi sa razvojem Toplifikaci-

cije Gračanice, kao jedinstvenog ekološkog projekta u Bosni i Hercegovini. Kako se radi o vrlo interesantnoj materiji, na sjednici je postavljeno više pitanja i dato dosta korisnih prijedloga. Pri tome se nisu doveli u pitanje krajnji ciljevi Odluke, ali za njenu buduću primjenu, bit će potrebno građanima i privrednim subjektima pojašniti, ali i precizirati neke odredbe. Zaključeno je da se o Nacrtu te odluke obavi javna rasprava u roku od 60 dana.

1. 10. 2009.

Umro Izudin Duraković, direktor Bosanskog kulturnog centra

Dženaza je obavljena u petak, 2. 10. 2009. godine. Izo Duaković je rođen 1955. godine u Gračanici, Završio je Fakultet političkih nauka u Sarajevu, prije rata radio kao novinar u gračaničkim preduzećima “Trgoproduct” i “Bosna”. U toku rata za Bosnu i Hercegovinu istakao se kao ratni reporter, fotograf i šef Pres centra Operativne grupe (gračaničke) A BiH i 22. divizije A BiH, objavljuvao je priloge u raznim listovima i elektronskim medijima. Osim desetak izložbi ratne fotografije, autor je ili koautor više publikacija o ratnim zbivanjima na području općine Gračanica, među kojima su najvažnije “Od OPŠ TO do OG-2” (1994.), “Uspjesi u 1994” (1995) i “Izvršni odbor u ratu” (1999). Poslije rata radio je kao novinar i glavni i odgovorni urednik Radio Gračanice, a od 2002. do početka 2009. kao direktor BKC Gračanica. Opaka bolest ga je onemogućila da završi i drugi mandat na toj odgovornoj dužnosti.

Kao direktor, posebnu pažnju poklanjao je kulturnoj misiji ustanove, na čijem je čelu bio. Zaslužan je, između ostalog, za otvaranje Zavičajne zbirke u Gračanici.

Bio je omiljen među saradnicima, na-dasve dobar i plemenit čovjek.

7. 10. 2009.

Širbegović Libiya i libijski partner potpisali ugovor u Misurati vrijedan 21 milion eura

Radi se o vanjskom uređenju veli-



kog turističkog naselja u Misurati, koje će se raditi po standardima visokog turizma u svijetu: videonadzor, savremeni konvergentni komunikacijski sistem, 5 bazena za djecu, 10 km pješačkih staza, 220.000 m² zelenih površina sa sistemom za navodnjavanje, postrojenje za prepumpavanje sanitarnih voda u gradsku kanalizacionu mrežu, 560 stubova vanjske rasvjete itd.

U tom turističkom naselju Širbegović Libya već realizuje projekat izgradnje 500 apartmana. Kompletna projektna dokumentacija i za ovaj dio posla urađena je u Projektnom birou Širbegović.

“Ono što smo već uradili u Libiji predstavlja temelj našeg budućeg djelovanja u toj zemlji. Trenutno su u toku pregovori oko još nekoliko značajnih projekata, izjavio je za medije Faruk Širbegović, predsjednik Širbegović grupe.” (*Press “Širbegović grupe”*)

15. 10. 2009.

“Akreditacija”- drugi kratkometražni film Gračanilje Miralema Džaferovića

Po svemu, radi se o tipično gračanič-

kom “kulturnom proizvodu”. Film je sniman u Gračanici i svi njegovi protagonisti su iz Gračanice. Film je produciran u kućnom studiju BLEF Gračanica, autora i reditelja Miralema Džaferovića, adaptaciju teksta i scenarij potpisuje sam redatelj, dok je kamerman filma Fahrudin Kurtović. Rad na “Akreditaciji” još potpisuju Mirsad Čamdžić kao snimatelj tona, Maid Džaferović za montažu i “Predgrupa” za muziku. Zvijezde premijerne večeri bili su glumci Mirza Đulić, Dženana Kuduzović, Smajo Hasić, Senada Letić, Nedim Krajnović, Sadedeta Beganović i Hajrudin Hodžić. Film je izazvao zapažen interes domaće publike, a posebno mladih.

Prema izjavi koju je Džaferović dao za E magazin “Gračanicablog”, podloga filma je jedna “filmična” priča Benjamina Sarajlića, koju je kroz takozvano “kreativno promišljanje” uspio pretočiti u gračanički prostor i odnose. Problematiziran je neravnomjeran položaj dvije žene u potpuno istim situacijama, koje svakodnevno susrećemo u stvarnom životu. U tom kontekstu pojavljuju se mnoga pitanja, počevši od onog klasičnog–da li nas je na svijet donijela roda ili ševa (naravno, u prenesenom značenju), pa do razmišljanja o seksualnosti i muško-ženskim odnosima u svakom pogledu: da li smo svi jednaki ili nismo, ako smo isti, zbog čega smo različiti, koliko nam fizički izgled pomaže i konačno, ko u tim odnosima dobiva, a ko gubi i tako – sve ukруг...” (fotosi i tekst E magazin “Gračanica blog”)

29. 10. 2009.

12. sjednica Općinskog Vijeća Gračanica: u znaku rasprave o rebalansu Budžeta za 2009. i projekcijama B udžeta za 2010. godinu

U periodu od januara do septembra 2009 godine došlo je do drastičnog smanjenja poreznih prihoda Budžeta u iznosu od 1.979.000 KM ili 24.13%, te smanjenja neporeznih prihoda od 47.000 ili 2.45% u odnosu na plan. Budući da su tekuće potpore

narasle za 230.000 KM, aktuelno smanjenje budžeta za period januar-septembar 2009 godine iznosi 1.796.000 KM ili 16.22%. Načelnik Nusret Helić je u svom izlaganju naveo da Općina nema deficit u budžetu, ali da je radi smanjenih prihoda od poreznih i neporeznih sredstava, uzrokovanih nedostatkom sredstava od viših nivoa vlasti, rebalans budžeta obavezan. Prijedlog rebalansa budžeta za 2009 godinu usvojen sa 18 glasova za i 10 protiv.

Obim Budžeta za 2010. godinu planiran je u iznosu od 10.102.000 KM, što je osjetno manje u odnosu na 2009 godinu. Nacrt Budžeta dat je u javnu raspravu.

Od ostalih 12 tačaka dnevnog reda, vrijedi spomenuti Odluku o utvrđivanju standarda i kriterija za imenovanja na upražnjene pozicije u reguliranim tijelima općine, Informaciju o radu sportskih klubova u 2008. godini (koja nije usvojena), Izvještaj o snadbijevanju električnom energijom područja Općine Gračanica za 2008. godinu, davanje saglasnosti na statute mjesnih zajednica: Pribava, Miričina, Stjepan Polje, Babići i Donja Orahovica, te druge odluke, rješenja i zaključke.

29. 10. 2009.

12. sjednica Općinskog Vijeća Gračanica: u znaku rasprave o rebalansu Budžeta za 2009. i projekcijama Budžeta za 2010. godinu

U periodu od januara do septembra

2009 godine došlo je do drastičnog smanjenja poreznih prihoda Budžeta u iznosu od 1.979.000 KM ili 24.13%, te smanjenja neporeznih prihoda od 47.000 ili 2.45% u odnosu na plan. Budući da su tekuće potpore narasle za 230.000 KM, aktuelno smanjenje budžeta za period januar-septembar 2009 godine iznosi 1.796.000 KM ili 16.22%. Načelnik Nusret Helić je u svom izlaganju naveo da Općina nema deficit u budžetu, ali da je radi smanjenih prihoda od poreznih i neporeznih sredstava, uzrokovanih nedostatkom sredstava od viših nivoa vlasti, rebalans budžeta obavezan. Prijedlog rebalansa budžeta za 2009 godinu usvojen sa 18 glasova za i 10 protiv.

Obim Budžeta za 2010. godinu planiran je u iznosu od 10.102.000 KM, što je osjetno manje u odnosu na 2009 godinu. Nacrt Budžeta dat je u javnu raspravu.

Od ostalih 12 tačaka dnevnog reda, vrijedi spomenuti Odluku o utvrđivanju standarda i kriterija za imenovanja na upražnjene pozicije u reguliranim tijelima općine, Informaciju o radu sportskih klubova u 2008. godini (koja nije usvojena), Izvještaj o snadbijevanju električnom energijom područja Općine Gračanica za 2008. godinu, davanje saglasnosti na statute mjesnih zajednica: Pribava, Miričina, Stjepan Polje, Babići i Donja Orahovica, te druge odluke, rješenja i zaključke.